

⁶Awhia.—Ki etahi ki te waiata e penei ana, "E whia maunga e tu mai ra." Ki te whakaaro ko tenei i runga nei te mea tika. He whakapotonga no Rangi-awhia, he maunga kei raro atu o Whangaroa.

⁷Tauwhare.—He maunga kei te takiwa o Hokianga. I whakahuatia ano i te waiata tangi a Papahia mo Te Huhu, kua taia i a Hepetema ra.

⁸Rorohu.—Ki etahi reo he purekerekere hau.

⁹Hoki.—He ingoa tangata.

¹⁰Ati-rangi.—Ko Ngati-Rangi, he hapu rangatira no Nga-Puhi.

10.—HE WAIATA MO TE HUI-RORI (Turanga).

NA TETAHI WAHINE O NGAI-TAWHIRI.

Kaore i te tino marama rawa te kaupapa o tenei waiata. Ko te korero a Hone Ngatoto, he kaumatua no Ngati-Porou, ki tona rongo na tetahi wahine o Ngai-Tawhiri, o Turanga, i tito tenei waiata mo Petera Te Huirori, he rangatira no Turanga. Ma nga iwi o tera takiwa e titiro iho, a e homai he korero.

1

Kaore hoki e te po nei
Tuarua rawa ko Te Hui-rori:¹
Ko taku hoa moenga ka riro ke,
Ka maunu ke atu he puta² ke:
Ko te whakawerawera o taku poho,
Katahi tonu au ka matao, i.

2

E noho maroke ana taku kaki,
He kore wai tata iho no runga nei.
Panukunuku ai te korirangi³
Te taha koia o taina kore.
Ka whakatakoto au hei rango waka,
Matua ngau e to mai nei.
E tapa noa ra koe i tahau ngeri,
Pouri, potango i te tinana, i.

HE WHAKAMARAMA:

¹Te Hui-rori.—He rangatira no Turanga. Kei a wai ra e mau ana tona whakapapa me ana uri?

²Putu.—Ki etahi ki te waiata e penei ana "pae."

³Te korirangi.—He momo kakahu Maori.

II.—HE TANGI MO AMARU-KAITANGATA (Te Aitanga-a-Hauiti).

He maramara waiata tenei i rangona e Apirana Ngata, e waiatatia ana e Te Aitanga-a-Hauiti i Uawa i te 15 o Mei, 1923. Ko Karauria Puhi-Puhi nana i waiata. No muri ka korero a Hone Ngatoto, ki tana rongo mo Te Amaru-kaitangata taua waiata, mo reira te kupu o te whiti tuarua "E Whare." E rua